

定鄉小識卷四

錢塘張道少南

山水記^四 龍門山路

龍門山有石關有魚石有四顧坪有鸚鵡石
有盤谷旁有九曲嶺有堰埭兜有冷水孔山
北近西溪有瑪瑙池山南近橫山有倒弔嶺
又南為千丈巖下有千丈洞山東為小和山
下為龍門阬有牛滑嶺山西為龍門嶺有獅
子巖又西為白龍山有白龍潭又西為午潮
山

定鄉小識卷四

一

龍門山 咸淳臨安志在西溪之欽賢鄉地高峻上
有龍池寺江月松風集龍門在定山西兩峯壁立
如門萬厯杭州府志焦山南為龍門山萬厯錢塘
縣志焦山之支西北行為龍門山錢塘縣志龍門
山在粟山西北地高峻上有龍門李氏西湖志所引康熙
錢塘縣志定山西有兩峯壁立名曰龍門許氏西
湖漁唱題注龍門山俗稱小和山杭州府志在縣
西南四十里高百丈長五里西達餘杭界錢塘縣
志作龍門嶺云在粟山西北靈隱寺志作龍門峯
云在烏石峯西西湖志從靈隱志誤入北山按粟

山與西溪接靈隱西去數里龍門在西溪西又去粟山數里故府志以爲去縣四十里也且聶心湯縣志亦載入西溪曰焦山之支西北行爲龍門山審地勢已非北山明甚當改從西溪路爲是

龍門山在小和山側乃定北鄉所轄咸淳志屬欽賢鄉者山北鄰西溪處也龍池寺宜作龍門寺錢思復江上山十咏皆以定山爲主其龍門曉雨詩注故云龍門在定山西魏氏志誤據是文於山川門失列龍門竟附於定山下胡氏駁其合龍門定山爲一誠是辨詳白龍潭條下又

定鄉小識卷四

二

胡氏定鄉襍咏注引夢梁錄云龍門山在長壽鄉大悲山塢與諸書異今攷吳氏原本云西溪龍門山長壽鄉大悲山塢乃類敘之文胡氏於龍門山下增一在字遂使龍門改隸長壽譌甚

徐翹

龍門行

龍門之山飛從天目來丹崖翠壑相縈迴霞奔霧突不知數混元蟠結長崔巍神工不能劈鬼斧不能摧誰知山下怪有飛騰物精光透出千年胎鱗角屈伸動天昏白日頽忽然地底走風雷劈崖摧

壑雙門洞開上有千仞摩天之絕壁下有一尺沒
履之荒苔不識神龍在何許但見飛泉挂壁零秋
雨褰裳濡足窮冥搜巖傾澗仄路修阻何如躡峯
頂採龍湫洗滌肺腑明雙眸跳珠濺玉空中起翠
黛濃疊羣峯稠捫崖倒瞰不見底心魂搖墮龍湫
水能令見者忽驚驚不止寒鳥哀啼古道旁玄猿
嘯匿深叢裏日落慘澹激陰風恍若棲我蛟龍宮
乾坤既兩闢萬古無鴻濛塵世難久處搔首問蒼
穹吾將喚起老龍騎向天目去坐看東海日月摩
盪無終窮

定鄉小識卷四

三

許承祖

龍門山

夾路松含鱗甲奇小和山下屈蟠宜便思獨向龍
門宿坐看噓雲掛雨時

龍門八景 西溪梵隱志龍門寺前佳勝曰石關
曰魚石曰千丈巖曰四顧坪曰老龍潭曰龜王
殿曰鸚鵡石曰盤谷

石關諸勝康熙錢塘縣志列入古蹟然天生
名勝宜歸山川又縣志無四顧坪今補龜王
殿仍詳古蹟

石關 康熙錢塘縣志在龍門山江元祚游記越是
爲龍門山憶寺存焉北則相傳蠻酋所據石關也

魚石 康熙錢塘縣志在龍門山

四顧坪 在龍門山

鸚鵡石 一名鸚鵡峯 亦名鸚哥石 康熙錢塘縣志在龍門山

卽江邦玉游記所云南有鸚哥石亭立崇岡宛
如琢就者也

釋明方 字石雨住仁和報國院

鸚鵡峯

問君獨立何所以松聲溪聲解我語常憶隴西長
定鄉小識卷四 四

不歸朝朝暮暮悲風雨有情端的到無情欲飛不
飛思伴侶伴侶因人棲華梁那知人競憐毛羽

龍門諸景 三首之一

鸚鵡峯

名自何年命凌風勢欲飛無情能克肖有恨復誰
歸立雪懷西隴披雲學舞衣老僧禪定久爾亦竟
忘機

盤谷 康熙錢塘縣志在龍門山

九曲嶺 在龍門山

釋明方

九曲嶺

一歌登一曲汗漫不爲遙
逼面雲連石過頭杖沒
腰竹疎生就嬾松老養成
驕鎖得溪聲住流泉不
可招

瑕埭兜 康熙錢塘縣志在龍門山

冷水孔 康熙錢塘縣志在龍門山西溪百咏序在

西溪之南大嶺坡下泉水清瑩逼人客至臨流無
不涼生肺腑

許承祖

冷水孔

定鄉小識卷四

五

清泉出穴冷侵膚一色精瑩似有無引脈試教歸
瑪瑙笑看寒月浸冰壺

瑪瑙池 康熙錢塘縣志在龍門山西溪百咏序瑪
瑙池在西溪南出百丈源清如碧靛池底皆細石
圓秀如瑪瑙狀

倒弔嶺 江元祚游記出千丈巖百數武上倒弔嶺
俱屬鳥道盤曲身在空中行

千丈巖 一名千仞巖
亦作千丈崖 近龍門山江元祚橫山草堂

記山後又有白龍潭千丈巖可暢游覽

釋明方

千丈崖

孤危成久立一嘯振崔巍鳥已銜花去猿難

縣志作猶

摘果來風雲磨歲月草木避塵埃小劫論初闢龍

門自此開

千丈巖洞 江元祚游記千丈巖下有巖洞洞有清

泉游覽者至此輒止

小和山 康熙錢塘縣志郡志在焦山南二里

小和山在龍門山東多竹樹游人登山行翠霧

中山徑盤曲十步一折南出龍門阨抵轉塘以

達於江北下西溪絕頂有金蓮寺定鄉之山以

定鄉小識卷四

六

和名者三大和山在湖步中和山在朱橋其次

為小和山也雁行伯仲序若弟晁究厥命名未

明何義惟大和聶氏志作大湖似以近石湖而

名仲叔二和美無別論然三山鼎峙而小和特

以神宇著名

厲 鶚

宿龍門山巢雲上人房

山在錢塘之西俗名小和山

山樓出樹杪夜宿萬山中虎嘯不驚定鐘聲疑在

空背窗棲鳥影滅燭聽松風明日尋階水應添十

二筒

按樊樹以小和山為龍門山謠

張葵

小和山

遙探絕境入深山指顧雲煙縹緲間西抱春江東
越水上連天府下塵寰風迴空谷幽蘭馥日落疎
林倦鳥還多少游人曾到此可能比卻老僧閒

夏日游小和山

雲橫山色半陰晴夾道叢篁漏日明溪鳥齊聲如
喚我野花雖豔不知名咒蓮座上同留飲題鳳門
中獨背盟正是肩輿人苦熱一天涼雨送歸程

龍門阮 在龍門山下

定鄉小識卷四

七

厲鶚

由牛滑嶺至龍阮

山腰多農家茅茨映山色暝煙歸樵人溪光帶禪
客樹遺鶴毳鮮泉瀉龍皖白愛此欲移居惆悵振
輕策

牛滑嶺 康熙錢塘縣志在龍門山西溪百咏序望
若濃黛松竹陰森不能通步

龍門嶺 萬厯杭州府志在縣治西南四十里西達
餘杭縣界康熙錢塘縣志焦山西北度大青嶺有
龍門嶺高百丈長五里達餘杭路

嶺北接上埠嶺

獅子巖 江元祚游記越龍門山進有獅子巖

白龍山 卽白龍潭山也

鄭永祺

楊大友仁卜居白龍山巖林

卜居遙向翠微岑
路入江村徑轉深
清磬悠悠聞古寺
澹煙遠遠出疎林
雲迷山色半窗畫
風遞泉聲一路琴
君去嗒然遺世累
笑予猶戀濟時心
高人結習戀林泉
俗物無緣到眼前
興至竹間聽鳥坐
倦來松下抱雲眠
塵心淨盡何非道
身世清

定鄉小識卷四

八

間卽是仙此去莫嫌溪水小
好騎龍背舞青天

白龍山訪楊大友仁

穿松過竹短筇支
遠上青巒訪舊知
山路凸凹行處險
芒屨彳亍步來遲
孤村列翠峯如畫
斜日明溪客欲詩
好景相迎誰敢戀
入雲先快話離思

由白龍山過龍門嶺

水村行盡又山村
樹遶峯圍嶺色昏
此後不須愁點額
躡雲幸已過龍門

老龍潭

一名白龍潭

在白龍山與龍門近
江月松風集

龍門在定山西兩峯壁立
上有龍潭能興雲雨歲

旱禱之輒應康熙錢塘縣志定山西有兩峯壁立名曰龍門上有龍潭下爲定山浦通長壽溪

胡敬崇雅堂詩集注云按龍門山在焦山南其潭卽江邦玉橫山草堂記所稱白龍潭是也至今歲旱鄉人每於此禱雨與定山相距甚遠魏氏沿游覽志之誤遂實之曰下爲定山浦於是龍門山乃合定山爲一矣諸山之譌莫此爲甚攷思復江上山十咏皆以定山爲主故云龍門在定山西縣志於定山下引此數語殊可不必蓋思復詩序意指龍門不指定山也顧其下云下爲定山浦則仍屬定山言魏氏體例每於一山下襍載數山水無論遠近信筆書之是其謬也胡氏摘譌尙未抉剔盡致耳

江元祚

字邦玉錢塘人築橫山草堂明馬元調有橫山游記紀其勝

游記

山水貴幽奇余結茅橫山陽境深奧矣求其奇峭士人以千丈巖白龍潭對余試往游徑由草堂折而北行萬竹間小橋流水縈迴三里抵嬌龍廟廟有古松夏雲摩日陰蔽重宇再折而進仍行竹樹間溪聲潺潺韻人齒屐如是可里許渟泓淵深鮮

翠可掬上覆危石坐鑑鬚眉余因名曰凌影潭潭之西崇岡相續如紫霞萬片層疊而成蒙絡翠蔓隱映修竹從是數武一折若斷復連皆就溪石蒲草間置足足底奔流沸白如沓練如濺珠如疊雪如奔馬而危嵐夾翠如劒鐔如蓮花如奇獸如落星種種莫可枚舉如是者又二里途徑轉仄或墮下或援上至最深處巍巖矗立氣凌蒼漢勢欲壓人爲色也類紫玉爲狀也儼瓊臺翠篠碧蘚可望不可卽是名千丈巖下有巖洞洞有清泉游覽者至此輒止再進飛瀑怪石爲荆茅豺虎所梗塞非

定鄉小識卷四

十

甚好奇者不能一縱屐齒出巖百數武上倒弔嶺俱屬鳥道盤曲身在空行余嘗謂不奇不快不險不奇正此謂也越是爲龍門山悟空寺存焉峯岫屏擁結址蕭遠南有鸚哥石亭立崇岡宛如琢就北則相傳蠻酋所據石關也進此有獅子巖逶迤起伏下嶺復上可四五里達聽法庵庵寄萬峯頂景色幽迥非復人世下二百武爲白龍潭險澁異常僅可側足不容正步兩巖中劈崢嶸如牛角虎牙齒齒相峙斧鑿劔削層磊成巖且苔蘚陰鬱寒飈襲人毛骨俱悚大類天台雙闕及矚龍潭伏地

猶懼情人拽足乃得縱觀潭深千尺奔流下注如
潑萬斛珠於碧玉峽其瀉響作聲轟雷疾霆哀絲
急筑莫喻其變山水奇邃至此極矣

徐如翰

老龍潭

昔我游天台最奇歎雙闕今來探幽勝雙闕儼在
睫茲山鬪雄傑云是白龍穴我思神龍德天高并
海闊卷之藏一掬乃在危崖窟想其初闢時萬靈
供劈裂割露切雲霞紫碧競紛拶矯立復徐行折
旋而勁決層疊豈砌壘凹凸似噉齧迴復疑揖讓

定鄉小識卷四

十一

昂俯互矜軋磴仄杖履愁莽深衣袖滑導迷藉老
僧十步九顛蹶入險援而垂履巉躍且蹇以臀代
足行磨襯及胸頰覓徑地已盡窮險天轉豁微風
拂羣木忽作雷霆發瑟瑟細泉鳴逗澗倏飛雪側
臥欲俯窺曳足懼隕越遙見石脈綻隨風噴珠沫
倚巖仰面看萬峯翠攢匝流雲墜鼻端卻與噓氣
接詭幻鬼所驚靜奧神所說恍恍鍊魂形森森豎
毛髮願蓄霖雨資乘時消赤魃勿佐海若狂嘯波
恣漂沒當令雙闕名從茲遜靈絕

田藝蘅

白龍潭

薄暮登山興若何又從楓樹嶺頭過斜攀鳥道凌
虛久俯探龍湫歷險多瀑布自天飛怪雨石門如
峽鎖驚波好奇翻抱臨深悔魂夢搖搖挂薜蘿

釋明方

同公履次倫游龍潭次韻

蛟戶風迴度石關此番卻值遠游還搏珠返擲當
兒戲屑玉飛空似等閒不爲詩人消渴想亦應於
我破頹顏情知世界紛無緒何事歸山又出山

午潮山 在白龍山西上有道院山西南卽白沙塢

定鄉小識卷四

十二

東塢山

定鄉小識卷四